



Basilius qui & Veselius dicebatur, apud Groningenses in Phrysia natus & educatus est. Is post prima literarum & artium fundamenta in patria percepta sese Lutetiam contulit, & diligētem operam philosophiæ & Theologiæ impendit. partem etiam temporis in Hebraica & Græca lingua perdiscenda cōsumpsit. Vnde factum ut in uirum doctissimum euaserit, atq; Theologiæ Doctor creatus sit. Is postea in patriam reuersus, mirum in modum felici ingenio Rodolphi Agricolæ adolescentis delectabatur, atq; eum aliquoties in rebus abstrusioribus instituit. Vnde Rodolphus eius doctrina incensus, quoq; linguis operam dare cœpit.

Cum Basilius in Gallia extiterat, in quorundam Basiliensium iuuenum familiaritatem peruenerat. Itaq; ob eorum amorem sese Basileam contulit, atq; ibidem liberales artes unā cum linguis & Theologia exposuit. Inter alia uerò Romanæ ecclesię errores deplorauit, atq; gratuitam iustificationem per fidem inculcauit. Purgatorium etiam & Indulgentias planè improbauit. Testatur Capnio Reuchlinus, qui adolescens eum Basileæ profitentem audierat, hunc Basilium Græcam & Hebraicam linguam mediocriter calluisse. Id quod eo tempore 1470 erat in Germania rarissimū. præterea quod idem in Theologia, Medicina, & reliqua Philosophia facillè omnibus illius ætatis professoribus antecelluerit, & lux mundi dictus fuerit. Postea uerò Basilius sese domum contulit, atq; ibidem magna laude in patria sacras literas exposuit. ubi etiā mortuus, quiescit. Philip. Melancht. in uita Rodolph. Illyr. in catal. test. ueritat.